



Broj: 07-11-1123/21  
Vogošća, 24.08.2021. godine

Na osnovu člana 70. Zakona o javnim nabavkama BiH ("Službeni glasnik BiH" broj: 39/14), i čl. 71. i 125. Statuta Općine Vogošća ("Službene novine Kantona Sarajevo", broj 27/14 i 14/15 Prečišćeni tekst), Općinski načelnik dana 24.08.2021. godine donio je

**ODLUKU  
O IZBORU NAJPOVOLJNIJEG PONUĐAČA ZA NABAVKU KANTI ZA ODVOJENO  
PRIKUPLJANJE OTPADA**

**Član 1.**

Ponuda ponuđača "T&A auto" d.o.o. Visoko, ulica Zanatski centar Sebilj 2 bb. Visoko, odabrana je za nabavku kanti za odvojeno prikupljanje otpada, kao jedina formalno-pravno ispravna ponuda, sa ponuđenom ukupnom cijenom nabavke u iznosu od 38.280,00 KM bez uračunatog PDV-a, odnosno 44.787,60 KM sa uračunatim PDV-om.

**Član 2.**

Odluka o izboru najpovoljnijeg ponuđača će biti objavljena na web stranici Općine Vogošća, istovremeno s upućivanjem ponuđačima koji su učestvovali u postupku javne nabavke, u skladu sa članom 70. stav 6. Zakona o javnim nabavkama BiH.

**OBRAZLOŽENJE**

Općinski načelnik je dana 19.07.2021. godine donio Odluku o pokretanju Otvorenog postupka nabavke kanti za odvojeno prikupljanje otpada, zajedno sa objavljivanjem Obavještenja o nabavci i tenderske dokumentacije na Portalu javnih nabavki BiH dana 23.07.2021. godine pod brojem: 1353-1-1-140-3-102/21.

Sažetak Obavještenja o nabavci objavljen je u "Službenom glasniku BiH" broj: 47/21 od 30.07.2021. godine.

Tendersku dokumentaciju sa Portala javnih nabavki BiH je preuzelo 12 (dvanaest) ponuđača. Krajnji rok za dostavu ponuda bio je 19.08.2021. godine do 12:00 sati, te je izvršeno javno otvaranje ponuda, što je konstatovano Zapisnikom sa otvaranja ponuda od 19.08.2021. godine.

Nakon izvršenog otvaranja ponuda, Komisija za javne nabavke je pristupila analizi dokumentacije priložene uz ponude, u smislu provjere njihove validnosti, s obzirom na iskazane zahtjeve ugovornog organa u Tenderskoj dokumentaciji broj: 07-11-1123/21 iz jula 2021. godine, odnosno pregledu ponuda u skladu sa procedurama i pravilima utvrđenim Tenderskom dokumentacijom, te Zakonom o javnim nabavkama BiH i pripadajućim podzakonskim aktima.

Shodno navedenom Zapisniku sa otvaranja ponuda, Komisija za javne nabavke je konstatovala da su zaprimljene 2 (dvije) ponude i to:

R.B.	NAZIV PONUĐAČA/GRUPE PONUĐAČA	UKUPNA CIJENA (KM) bez PDV-a	POPUST	CIJENA (KM)SA POPUSTOM bez PDV-a	UKUPNA CIJENA (KM) sa PDV-om
1	"Ezio inox" d.o.o. Ilijaš	33.996,00	/	/	39.775,32
2	"T&A auto" d.o.o. Visoko	38.280,00	/	/	44.787,60

Uvidom u priloženu dokumentaciju i suštinskom provjerom sadržaja i validnosti iste, Komisija za javne nabavke je utvrdila sljedeće:

Ponuda ponuđača "Ezio inox" d.o.o. Ilijaš ne ispunjava formalno-pravne uslove tražene Tenderskom dokumentacijom i to:

- Tačkom 8.2.1.TD a u skladu sa članom 58. Zakona, propisano je da Ponuda mora da sadrži sljedeće elemente i to između ostalih:
  - Izjavu o ispunjenosti uslova iz člana 45. stav (1) tač. a) do d) Zakona (Lična sposobnost), sačinjena i popunjena u skladu sa šemom koja je data u Aneksu 3. tenderske dokumentacije, potpisana od strane ponuđača i ovjerena i potpisana od strane nadležnog organa (sud, notar ili općina).
  - Obrazac pismene izjave iz člana 52. Zakona o javnim nabavkama BiH ("Službeni glasnik BiH" broj 39/14), sačinjen i popunjen u skladu sa šemom koja je data u Aneksu 4. tenderske dokumentacije, potpisana od strane ponuđača i ovjerena i potpisana od strane nadležnog organa (sud, notar ili općina).

Tačkom 8.1.4.TD je jasno propisano da se Ponuda izrađuje na način da čini cjelinu i ista mora biti napisana neizbrisivom tintom.

Ispravke u ponudi moraju biti izrađene na način da su vidljive i potvrđene potpisom ponuđača, uz navođenje datuma ispravke.

Ponuđač "Ezio inox" d.o.o. Ilijaš je u svojoj Ponudi (strana 4. i 5. Ponude) dostavio popunjen Aneks 3. (Izjava o ispunjenosti uslova iz člana 45. Zakona) i Aneks 4. (Izjava iz člana 52. Zakona).

U dijelu dostavljenih Izjava-mjesto i datum davanja izjave, ponuđač je izvršio ispravku datuma na način da je ranije upisani datum ispravio korektorom, te je preko istog unešen novi datum (16.08.2021. godine), sa potpisom ponuđača ali bez pečata i navođenja datuma izvršene ispravke.

Agencija za javne nabavke BiH u svom mišljenju broj: 04-02-1-4-2/19 od 07.01.2019. godine, a koje se odnosi na primjenu člana 18. stav 1. Uputstva za pripremu modela tenderske dokumentacije i ponuda ("Službeni glasnik BiH", broj 90/14 i 20/15) navodi da je ponuđač "dužan da pazi da ispravka bude vidljiva, npr. ispravku izvršiti vodoravnim precrtavanjem upisa u toj rubrici i unošenje ispravnog teksta u slobodni dio rubrike uz obavezno stavljanje datuma ispravke i potpisom ponuđača.

Potvrđivanje ispravke od strane ponuđača mora biti izvršeno potpisom ponuđača i datumom ispravke, u suprotnom, izgubio bi se smisao autentičnosti i vjerodostojnosti same ispravke".

Također, praksa Ureda za razmatranje žalbi BiH po pitanju ispravki greški bez potpisivanja i navođenja datuma kada je vršena ispravka, u Rješenjima broj:

- JN2-03-07-1-1261-8/16 od 12.01.2017. godine,
- JN2-01-07-1-803-8/17 od 18.01.2018. godine,
- JN2-02-07-1-628-6/17 od 01.02.2018. godine i
- JN2-02-07-1-520-7/17 od 02.04.2018. godine

je da su ispravke koje nisu potvrđene potpisom i datirane bile razlog za odbijanje ponuda kao neprihvatljivih.

Stav Ureda za razmatranje žalbi BiH po pitanju korekcije koja je načinjena korektorom, potpisana i ovjerena, ali nije datirana, u Rješenju broj: JN2-01-07-1-808-7/17 od 18.01.2018. godine, ocijenjena je kao povreda člana 18. stav 1. tačka m) Uputstva za pripremu modela tenderske dokumentacije i ponuda i kao razlog neprihvatljivosti ponude.

Na osnovu iznesenog, a uz uvažavanje gore citiranog mišljenja Agencija za javne nabavke BiH kao i prakse Ureda za razmatranje žalbi BiH, Komisija za javne nabavke smatra da je ponuđač "Ezio inox" d.o.o. Ilijaš postupio suprotno odredbi člana 18. stav 1. Uputstva za pripremu modela tenderske dokumentacije i ponuda, te je stoga predmetna ponuda kao takva neprihvatljiva za ugovorni organ.

Detaljnim postupkom pregleda i ocjene ponude, Komisija za javne nabavke je utvrdila da ponuda ponuđača "T&A auto" d.o.o. Visoko ispunjava formalno-pravne uslove, odnosno zahtjeve ugovornog organa tražene Tenderskom dokumentacijom.

Zatim je Komisija za javne nabavke pristupila razmatranju finansijskog dijela ponude ponuđača "T&A auto" d.o.o. Visoko, te je izvršena računska provjera dostavljene ponude i utvrđeno je da nema računskih grešaka, a sve u skladu sa odredbom člana 17. stav 1. Uputstva za pripremu modela tenderske dokumentacije i ponuda ("Službeni glasnik BiH" broj: 90/14 i 20/15).

Obzirom da je Ponuda ponuđača "T&A auto" d.o.o. Visoko sa ukupnom ponuđenom cijenom u iznosu od 38.280,00 KM bez uračunatog PDV-a, prelazila procijenjenu vrijednost nabavke koja iznosi 34.000,00 KM bez uračunatog PDV-a, Komisija za javne nabavke je dana 24.08.2021. godine zatražila izjašnjenje od nadležne Službe da li može obezbijediti razliku sredstava u iznosu od 4.280,00 KM bez uračunatog PDV-a za realizaciju predmetne nabavke.

Služba za komunalne poslove se aktom broj: 07-11-1123/21 od 24.08.2021. godine očitovala da će obezbijediti razliku nedostajućih sredstava za realizaciju predmetne nabavke.

Iz navedenih razloga, a primjenom člana 64. stav 1. tačka b) Zakona o javnim nabavkama BiH ("Službeni glasnik BiH" broj: 39/14), Komisija za javne nabavke je jednoglasno dala preporuku Općinskom načelniku da donese Odluku o izboru najpovoljnijeg ponuđača "T&A auto" d.o.o. Visoko, za nabavku kanti za odvojeno prikupljanje otpada, kao jedine formalno-pravno ispravne ponude, sa ponuđenom ukupnom cijenom nabavke u iznosu od 38.280,00 KM bez uračunatog PDV-a, odnosno 44.787,60 KM sa uračunatim PDV-om.

**Pouka o pravnom lijeku:** Ponuđač koji je učestvovao u postupku nadmetanja može radi zaštite svojih prava, u roku od deset dana od prijema Odluke o izboru najpovoljnijeg ponuđača izjaviti žalbu. Žalba se podnosi Uredu za razmatranje žalbi BiH putem ugovornog organa.

Izradio: Mirza Čutura

*Mirza Čutura*

Kontrolisala: Melisa Kršo

*Melisa Kršo*

Dostavljeno:

1. "Ezio inox" d.o.o. Ilijaš
2. "T&A auto" d.o.o. Visoko
3. Nadležnoj Službi
4. U dosije
5. a/a

033/894-033

032/738-526



OPĆINSKI NAČELNIK

*Edin Smajić*  
Edin Smajić